



Tir Yimyim

www.tirymyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymyim@gmail.com

TAPAK 3

TAPAK 8

BTC tanishir Pramod Boro-i kakeshir aser lokti lennirtem den ajurutep

ran ajanga Trump densema US ketdangsür 48 aputsü metetdaksü

VOL. XVIII NO. 82 (ADOK 82) DIMAPUR

RASEMNÜ (WEDNESDAY) AENJETI (JANUARY) 06, 2021

₹ 5.00

Naga Hoho-i Centre dang NSCN den ceasefire tenzükshitsü ayongzüker

Dimapur, January 5 (TYO): Naga Hoho tentetba nungi Indo-Naga yimten tebilemtsü timi angatetteptsü atema inyaka arur aser tanga parnok India sorkar dang tatemzüka kecha melii NSCN den ceasefire tenzükshitsü atema tayongzüka agütsüogo.

NSCN (K)-i 2001 küm Centre den ceasefire tenangzüktep agi saka taoba chairman S S Khaplang taküm alidang, March 2015 nung NSCN (K)-i ceasefire agienba ajanga ajak asoshi tebilemtsü tulu bentsür aru, ta Naga Hoho Tongti Tezüilur, K. Elu Ndong-i sangdong ka nung ashi.

Iba tia ajuruba ajanga 2016 küm Naga Hoho-i Eno. SS Khaplang den

ajuruteptsü atema Myanmar-i ao saka pa den majuruteptet. Ajisiaka, Naga Hoho-i SS Khaplang indang Emissary den ajurutepa yimjung maparen tejakleni aotsü atema India sorkar den cease-fire maneni alitsü osang metetdaksü.

Rtd. Gen. Niki Sumi-i kanga dang shisa kaa India sorkar den ceasefire alitsü telemteba agiba atema Naga Hoho-i tenüngsang agütsür. Ajisiaka, Naga nungeri India sorkar aser NSCN (Niki) tsingda kechi koma jembiteper'ar memetet lir. Anungji, India sorkari tatemzüka kecha melii NSCN den ceasefire tenzükshitsü atema ayongzüker, ta K. Elu Ndong-isa sangdong nung ashi.

NFHRCC-i Foothills Road tekara nung yangludaksünür

Dimapur, January 5 (TYO): January 2, 2021 nü NFHRCC senden amendang onük kar bangzüngtepba osang metetdaksüogo.

Aor MLA 11-i Chief Minister Nephui Rio den Foothills Road tebilemtsü lemsatepba atema NFHRCC-i pelaba metetdaksü.

NFHRCC-isa kin 11 nungi MLA tem dang parnok sasep nung amalitep alitsü aser sorkar dang iba mapa tekara nung tembangtsü atema ashitsü mepishia metetdaksü.

NFHRCC-i Tribal Hoho tongtitem dang January, 2021 matemdangsa telok shiai iba mapa atema Rs. 50,000 tenlatsü atema

mepishitsü lemtet.

Liphanyan nung Governor's Camp nung Doyang Bridge yangluba contractor M/S L Pukhato Shohe & Sons-i Covid-19 lockdown sülen mapa tenzüka atema pelar aser tekaratiba nung iba mapa tembangtsü mepishir ta NFHRCC-i metetdaksü.

NFHRCC-isa Foothills Road nung khu taret abenba truck garitem dang kanga dang kümdanga lenmang meraksatsü senzütsü tetuyuba agütsüogo.

Parnokisa Log Truck & Stone Crushers Operators dang pei pei mapa inyadkak lenmang anepalutsü metetdaksü.

Boris Johnson-i India semdangtsü aliba athir



Boris Johnson (File photo)

London, January 5 (Agencies): British Prime Minister Boris Johnson-i Mongulbarnü India-i arutsü aliba sentong athiba osang metetdaksüogo.

Boris Johnson ya January 26, 2021 nü India Republic Day nung tongti tesemdanger ka ama shilem agütsüba liasü.

"Prime Minister Boris-i tanep

Prime Minister Modi den jembiiogo. Sentong renemba ama tan ita India semdangi marutettsü ta pai ashi" ta Downing Street spokeswoman kati metetdaksü.

"Yasüng national lockdown alitsü osang sangdongba aser coronavirus tasenba prokshiba ajanga Prime Minister Boris-i sentong athitsüsa aküm. Pai ainleni moi UK nung alitsüba tongtipangba ta bilemer" ta spokeswoman-isa ashi.

Boris Johnson-i UK nung G7 Summit malidang, taküm küm tetenzüklena India semdangtsü tabo metetdaksüogo.

Johnson-i India semdangtsüba osang ya taoba ita British sorkari metetdakja liasü.

United Kingdom-i European Union toktsüba sülen shishilembatsü atema linük tasentem den tesentaktep yanglur aser iba nung India dena lir.

Feb 1 nü Union Budget benoktsü

New Delhi, January 5 (Agencies): January 29 nungi February 15 tashi Parliament nung Budget Session mezüngbuba shilem agütsü aser February 1 nü Union Budget 2021 benoktsü.

Budget Session tanabuba shilemji March 8, 2021 nungi tenzütsü.

Iba telemteba ya Cabinet

Committee on Parliamentary Affairs (CCPA) ajanga agi.

January 29 nü Economic Survey benoktsü aser Parliament nung House anaprong nung anogoshia ghonda pezüzü session amentsü.

Tir Ram Nath Kovind-i January 29, 2021 nü House anaprong- Lok Sabha aser Rajya Sabha nung o jembitsü.

COVID-19 Nagaland: Taneptsü angur 97.01% kümogo

Kohima, January 5 (TYO): Nagaland nung tanü agi anogo terbuba COVID-19 aliba puteter dang nungibo taneptsü angur timba süa aruogo. Nisung 11,937 dak COVID-19 aliba putetba nungi tang nisung 144 dang anepaludar.

"Mongulbarnü nisung 2 dak COVID-19 aliba putetogo. Dimapur aser Peren nungi nisung kaka dak putet. Külen, nisung 30 taneptsü angur. Parnokji Mokokchung nungi 26, Kohima nungi 3 aser Dimapur nungi 1 lir" ta Health & Family Welfare Minister, S Pangnyu Phom-i metetdaksü.

Nisung 11,937 nungi parnok 11,581 taneptsü nguogo, ta paisa ashi.

Tanü taneptsü angurtem züngsema Nagaland nung taneptsü angubaji 97.01% kümogo. Nagaland nung COVID-19 agi shirangerji 1.2% dang lir, ta

Minister Pangnyu-isa metetdaksü.

"Nagaland nung COVID-19 aliba puteter nisung 79 süogo. Tasürtem rongnung parnok 69 coronavirus ajanga aser 10 tanga timtem ajanga asü," ta Health & Family Welfare Department Director, Dr Denis Hangsing-i ashi. Nisung 133 tashi tanga state temi ogo, ta paisa shisem.

District balala nung COVID-19 putetba: Dimapur (6,405), Kohima (3,715), Mon (604), Peren (503), Tuensang (244), Mokokchung (179), Zunheboto (142), Phek (47), Kiphire (41), Wokha (39) aser Longleng (18).

Nisung 11,937 rongnung Traced Contacts 4,876, armed forces personnel 4,657, tanga state tem nungi arur 1,837 aser Frontline Workers 567 lir, ta Dr Hangsing-isa ashi.

District balala nung tang anepalurtem: Dimapur (73),

Kohima (50), Mokokchung (14), Peren (5), Mon (1) aser Kiphire (1).

"Tang anepalurtem rongnung parnok 22 dak shirangba yimya terara lir, ka kanga shiranga oxygen agidar aser 3 ventilator nung yua lir. Nisung 118 dakbo shirangba yimya kecha mali" ta Dr Hangsing-isa ashi.

Taneptsü angurtem: Dimapur (6,209), Kohima (3,613), Mon (592), Peren (498), Tuensang (243), Zunheboto (139), Mokokchung (157), Phek (47), Kiphire (39), Wokha (35) aser Longleng (9).

"Nagaland nung COVID-19 alitsü akok ta temulung melemi bilemba sample 1,21,009 tendangogo. RT-PCR ajanga sample 72,556, TrueNat ajanga sample 36,781 aser Rapid Antigen Test ajanga sample 11,672 tendang" ta Dr Hangsing-isa metetdaksü.

Morok mi ajanga Dzukou lenden kongshiogo

Kohima, January 5 (TYO): December 29, 2020 nungi Dzukou tzükong nung morok mi tenzüka ajanga Dzukou lenden nunga tesem kar kongshiogo.

Tanü agi anogo tibuba Dzukou tzükong nung morok mi aoer.

"Mongulbar tashi nung mi enseptsü imlaa liasü saka tanü tayimtsü ajanga repringdanga senzüdang morok mi ajunga mazüoktet aliba nguogo aser tesem aika nung rongdar," ta Nagaland State Disaster Management Authority indang OSD, Johnny Ruangmei-i ashi.

Aonung mopung ajanga mi belenshir aser tesem tasen aika nung ki jangruloka aoer, ta paisa ashi.

Iba ajanga Dzukou lenden nung tesem kar nung mi kaolokogo. Yashi tashibo iba tesem nung mi agi mekongshi liasü, ta Johnny Ruangmei-isa metetdaksü.

"Onoki iba mapa nung NDRF units asem anioktsü telemteba agiogo aser Ministry of Home Affairs dang iba osang sangoktsüogo. Onoki Nagaland state nunga Home Guards and Civil Defence, Police aser local volunteers den nisung talila anioksemtsü" ta paisa ashi.

Bodbarnü IAF helicopter pezüi maneni anüing nung tzü aintsü aser ali nunga mapa inyaktsü, ta Johnny Ruangmei-isa shisem.

NAGALAND CM-i

TAYIMTSÜ AJANGA REPRANGDANG:

January 5, 2021 nü Chief Minister, Neiphiu Rio-i tayimtsü ajanga Dzukou Valley nung morok mi agi teraksa bentsür aruba aser mi enseptsü atema mapa inyakba repringdangogo.

"Nisung ajaki iba mapa nung külemi yaritepba angudang kanga pelar. Mi yakta enseptsü ta ni imlar" ta Rio-i metetdaksü.

Tanü Advisor (IT&C, NRE and Science and Technology) Mmhonlumo Kikon, Advisor (Higher & Technical and Election) Medo Yhokha, Home Commissioner Nagaland aser District Forest Officer (DFO) Kohima nungertemi Chief Minister Rio meina senzü.

OKM - Tetsü Oshi Tetoktepba 2018-2021 takok ngua tembangogo

Mokokchung, Jan 5 (TYO): Ongpangkong Kaketshir Mungdang (OKM)-i ayongzüka Tetsü Oshi Tetoktepba 2018-2021 sentong küm asem tashi tetoktepba tapu balala agiyonga arur, tanü Jan 5, 2021 nü tatembangbuba tetendangba yangi Mokokchung town hall nung takok ngua agiogo.

Iba tetoktepba nung mezüing senpetji Longmisa unit nungi; Kr. Wangshimonglai agizük, tanabuba aser tasembubaji Chuchuyimpang unit nungi dang Kr. Manenjungla aser Kr. Lanukokla nati angu. Tetoktepertemji OKM kübok unit shia nungi kaketshir parnok 42 liasü. Takoker mezüngbuba jenjang angur nem senpet sen 20,000/-, tanabuba nem 15,000/- aser tasembuba nem 10,000/- den takoker ajak nem nünyu kuli kaket tajung kaka senpettsü.

2018 nungi tenzüka tetendangba ka nungi tenet (Phase 1-7) tashi agi aser iba nung jagi tajungtiba 10 shimtet aser par 10 tsüingda tatembangbuba tetendangbaji agia liasü. Küm 3 tsüingda nung tetendangbatemji; pongtem züingtep (paragraph reading), sangro temulung agi azüingba, jeptak Aor shino ratet, Aor tar nunger otsü shitepba, Arok Osep (dictionary) nungi zülüjang A, S aser T ojangtem, rajem zülü (essay) aser noksa ratet (picture interpretation) nungertem agi. Tatembangbuba tetoktepbaji tetendangba agiyonga arudang tetoktepertemi shilem tajungtiba agiba "tar nunger otsü shitepba" nungi toktepa liasü. Tetoktepbatemji "tetsü oshi jembitettsüla, züingtettsüla aser zülütettsüla" omen nung ajemdaker ayongzüka liasü.

Sentong meraketsür Ao Senden Tir, Wb. Chubawati Longchar-i Ao oshi wazüka ayuba nung temulung tali agütsütsü asoshi tayongzüka o tulu bener arua lemsatep. Sentong nung Ao Kaketshir Mungdang tir Sb. Nungdokyanger, OKM tir Sb. Talitemtsü, OKM Tetsü Oshi Tetoktepba tayonger Wb. Aso Imsong, OKM – TOT tetendanger tongti Wb. Sashimeren, OKM-TOT sentong ketdangsür Kr. A. Limasenla Jamir parnokia shilem balala agia liasü. Khensa Kaketshir Telungjem ajanga tesentepertem saksalemdakja ken tajung ka aten. Artang Baptist Arogo Pastor Dr. Bendang den temoatsü meshia sarasademer tenzüker aser Alempang Baptist Arogo Pastor Rev. Temsü S den tenüngsang agüja sarasademer sentong shibanga liasü.

MP Tokheho-i Dr. Nihoto P. Chishi indang takum otsü kaket saya



Dimapur, Aenjeti/January 05 (TYO): Dr. Nihoto P. Chishi sor küm 95 ajungba nüngtem nung Dr. Hesheto Y. Chishi-i pa taküm otsü kaket ka züluba tanü January 5, 2021 nü MP Tokheho Yephthomi ajanga Nihoto Village, Dimapur nung sayatsü.

Iba kaket sayaba sentong nung tetushi tesemdanger ka ama jembiba mapang Nagaland nungi Parliament züngsem Tokheho Yephthomi-i ashiba agi,

1963 küm Aghunato town nung Dr. Nihoto P. Chishi ya pa indang school tesayur liasü.

Par mapang tesayur tajungtem rongnung pa ka liasü, shibai mapang shidak amshi, ochishia aser bendanga agütsür nübur tenzük. Pa ya yimjung meimba senso ka aser dangar yaritsü jangraba takum ka liasü. Tanü lanurtemi pa dak nungi yimya tajung jenti angazüksü lir, ta Tokheho-i ashi.

Iba sentong nung kaket zülur nungi jembiba mapang, Dr. Nihoto P. Chishi dak teyari nüngdaka alir atema aria bilemba aser tagütsünü molungsentsü keta lir, ta Dr. Hesheto Chishi-i ashi,

Pai yimer-yimsanger atema tajung bilemba ya ajaki pelashishia agizükteter. Pai arishi küm 95 tashi nübur tenzuka aruba asadangtsü makok, ta kaket züluri ashi.

Iba sentong nung Director, NPPC, Ahovi Zhimomi menden liasü aser secretary, NPPC, Shikaho Chishi recorder liasü.

Mughalu Aowomi, pastor NBC ajanga sentong tenzuka sarasadem, Nihoto Baptist Church nungi lanurtemi temeja ken ka aten aser Kakheli Holo, Asso. Women Pastor NBC ajanga kaket meshiteta sarasademtsü. Tatem nung NPPC chaplain, Pihoshe Assumi ajanga sarasadema sentong tembanga liasü.



Dimapur, Aenjeti/January 05 (TYO): HQ IGAR (N) kübok Assam Rifles, Phek Battalion ajanga January 4, 2021 nungi tenzuka Sainik School, Punglwa nung azüngtsü jangrar nem Phek nung coaching class agütsür, koba February 6, 2021 tashi alitsü. Sainik School, Punglwa nung entrance exam atema registration maparen nung Assam Rifles, Phek Battalion ajanga Class VI aser Class IX nung azünger kaketshur 29 tashi yaria liasü. Tebur 15 aser tetsür 4 coaching ya agir.

Deputy Commissioner, Mokokchung ajanga senden ayonger

Dimapur, Aenjeti/January 05 (TYO): 72 buba Republic Day anogomung dak sendakba onüktem jembitsü atema ADC (Planning), Mokokchung indang Conference Hall nung January

8, 2021 anepdang 11:00 ako nungi senden ka alitsü, ta Mokokchung District kübok Heads of Offices ajak dang metetdaksür, ta Deputy Commissioner, Mokokchung,

Limawapang Jamir ajanga sangdong ka nung ashi.

Ketdangsür ajak iba senden nung medema arua adentsü metetdaksür, ta sangdong nungsa shia lir.

ADC Wokha ajanga Trade Permit yanglushitsü metetdaksür

Dimapur, Aenjeti/January 05 (TYO): Wokha Town Council tawabangba kübok aliba dokan kibur aser danga business establishment ajak dang February 15, 2021 tashinung Wokha Town Council office

nung office mapang parnok indang trade permit tem yanglushitsü metetdaksür, ta ADC & Administrator Wokha Town Council, Wokha, K. Mhathung Tsanglao ajanga sangdong ka nung ashi.

Latetja alima mapang nung permit meyanglur dang anogoshi sen 50 senchi achitsü. Anungji tarutsü nung timtem majurutsü atema ajaki iba totuyuba sülen anidaksüla, ta sangdong ajangasa ashi.



Nagaland nungi Ruovilhoukho Chuzho-i süng aser süngkum agi oset balala yangluba yimyatam angazüka pa sasa enterprise asem - The Naga's Feather, Collection Store, aser Chop Sticks - amenokogo. 2017 küm NBDA ajanga pa nem 'Promising Artisan of The Year' narokum agüja liasü. Arishi küm 16 nung lanur aikati pei nükjidong tongtettsü atema lenmang bushi tenüker. Ajisüaka Medziphema nungi Ruovilhoukho Chuzho-i 2005 küm shisaliok bushiba yutsür par kibong yarutsü atema tebu ama anogoshi aayanglen senzü tenzuka liasü.

Dzükou Valley merok mi ya nisung mapa: NPF

Dimapur, Aenjeti/January 05 (TYO): Dzükou Valley nung December 29, 2020 nü nungi tenzuka morok mi jangruba atema Naga People's Front (NPF) kanga temolung shiranger, ta NPF Press Bureau sangdong ka ajanga ashi.

Dzükou Valley nung tang adoka aliba morko mi ya pasasa adokba ta mezüngshitsüla, saka ibai nisung mapa lir, koba agi iba telemok tebour raksatsüba kisüng masü saka aser müketa aliba tzü-mopung nem dena timtem agütsür, ta ashi.

Dzükou Valley ya raliwalir atema kisüng tongtipang masü saka linük atema rongsen ka amai lir, kong süngtong-litong aser shiruru tabu balal lir aser iba ama arem arongba ajanga are maser yangji takum alibatem lendongbang nung yutsür. Anungji state sorkari atsü-anemba yimya mamshitsüla aser Chief Minister aser pa indang ministerial cabinet ajanga tsüngtong oa asadangtsüla aser mi remseptsü aser iba Valley kumzüksü atema nüngdakba

meratem agitsüla, ta NPF ajanga ashi.

Aser Dzükou Valley ya linük indang rongsen ka ama züngshir asünung Central sorkari tekeratiba nung süoki ia tensa asadangtsü aser iba morok mi adokba ya CBI mesüra NIA densema reprangtsüla, aser aibelener nem tapet temerenshi agütsütsüla, ta NPF ajanga Centre dang ajungshiba olen ka ashi.

Kasa mapang State Governor RN Ravi-i iba tensa süoki ia bilema Dzükou Valley tashi tsüngtong oa tensa asadanga tema NPF ajanga pelaba lemsatsep.

Maneni Indian Air Force (IAF), National Disaster Response Force (NDRF), State Disaster Response Force (SDRF), DC aser SP Kohima, Forest Department, Southern Angami Youth Organization (SAYO) Volunteers aser temolunger telok balalai iba morok mi remseptsü atema tajungtiba nung inyakba atema pelar, ta sangdong ajangasa ashi.

Security Forces ajanga telungpur ana apu



Dimapur, Aenjeti/January 05 (TYO): Security Forces temi Police den lungjemer operation ka agiba mapang January 03, 2021 nü Purana Bazar, Dimapur anasa telungpur ka apu, ta sangdong ka ajanga ashi.

Osang tejangja kar nung ajemdaker Security Forces den Police nungi teshimtet nübu kar dener operation agiba mapang telungpur ya apu aser pa ket nungi 22mm pistol ka den magazine nguteta liasü.

Pua alisang den pa ket nungi ngutetba hadir ya maneni asüngdangyatsü atema Dimapur East Police Station nem agütsüogo, ta sangdong ajanga ashi.

Ano maneni Security Forces

temi Police nungi teshimtet nübutem den lungjemer January 04, 2021 nü Old Showuba, Dimapur anasa operation ka agiba mapang NSCN (KN) züngsem ka apu, ta sangdong danga ka ajanga ashi.

Osang tejangja aruba nung ajemdaker Security Forces temi Police nungi teshimtet nübutem den lungjemer operation ka tenzuka NSCN (KN) züngsem ka apu aser pa ket nungi .32mm pistol ka den magazine aser injang kar nguteta liasü.

Maneni bushisüngdangtsü atema pua alisang NSCN (KN) züngsem den pa ket nungi ngutetba oset tem Diphupar Police Station nem agütsüogo, ta sangdong ajanga ashi.

Nokhu village council ajanga pelaba lemsateper

Dimapur, Aenjeti/January 05 (TYO): Nokhu indang Extra Assistant Commissioner, L Mungo lenisüba kübok Noklak District Administration ajanga December 21-22, 2020 anogotem nung Nokhu nüburtem atema Christmas sempet ama lenmang yanglushitsüba asoshi pelar, ta Nokhu Village Council (NVC) aser Nokhu Noking Village Council (NNVC) nati

sangdong ka nung ashi.

Kanga nungdaka aiba agütsütetba atema Deputy Commissioner, Noklak aser EAC Nokhu dang pelar, ta putu menden ana yagi ashi.

Iba tesem nung alirtem atema mapa tajung inyaktsüba ajanga onok teti ajungmesor, kong nüburtemi akhangba ama jeret-pereta meranga inyakba ajanga benjong mapang anisüngzük ngua mungogo, ta sangdong ajangasa ashi.

BTC tanishir Pramod Boro-i kakeshir aser lokti lennirtem den ajurutepe



Bodo Territorial Council (BTC) chief executive member (CEM) Pramod Boro-i Bodo Territorial Region (BTR) nung terenlok mapa inyaksü atema telok balala den ajurutepe senden amenba noksa nung angur.

Kokhrarajhar, January 5 (Agencies): Bodo Territorial Region (BTR) nung terenlok mapa inyaksü atema Bodo Territorial Council (BTC) chief executive member (CEM) Pramod Boro-i lokti aser kaketshir telok aika den ajurutepego.

"Iba ya otsütsü anogo ka lir kechiyong council members tasentemi kaketshir aser civil society lennirtem den ajuruteper. Iba ya BTR nung terenlok mapa inyaksü atema tang mezüng atema senden

amener" ta Boro-i ashi.

"Ni kaketshir telok ka nungi lir. Onoki council government ka ama mapa aika meinyakteter saka ajaki amalitepa terenlok bener arutettsü" ta paisa ashi.

CEM Boro-isa teloktem dang pei pei wadang nung tajungtiba inyaksü ayongzüik.

"Asenoki BTR nung alirtem ajak renlokdahtsütsü atema alizüng yua lir. Sorkar ketdangsübaren ajungtsü atema lokti shilem nungdaker" ta paisa shisem.

Boro-isa Bodoland language & cultural research centre ka lapoktsüba atema nungdakba metetdaksü.

"BTC nung sorkar tasenba ajanga tashishitsü melii aser takok ngua inyaksüla" ta All Bodo Students' Union (ABSU) president Dipen Boro-ia senden nung ashi.

Iba senden nung BTC speaker Katiram Boro, deputy CEM Gobindo Basumatary, Kokrajhar Lok Sabha MP Naba Kumar Sarania aser BTC züngsem aika aden.

Tashiyim aser nisung tepsetba ken o nung metentsür ka nem sorkar mapa agütsütsü

Imphal, January 5 (Agencies): Tetsür dak tashiyim agi shi nung medemba aser nisung tepsetba ken o nung metentsüba nisung ka nem sorkar mapa agütsütsü ta Manipur Chief Minister N Biren Singh-i metetdaksüogo.

2013 küm research fellow ka dak tashiyim agi shi nung medemba aser tepsetba ken o tai tongloktsüsang Thoudam Jibal Singh okadaki metentsü.

"Pa dak tai kecha mali. Pa küm 8 tashi tim mesüi tepuokdak ayu aser nisung telok kati par ki rongdoktsü. Pa nem sorkar mapa ka agütsütsü" ta Manipur CM-i ashi.

Thoudam Jibal Singh ya küm 8 tashi Sajiwa Central Jail nung puoka ayu. Regional Institute of Medical Sciences (RIMS) nung Pathology Department nung junior research fellow ka dak

tashiyim agi shi nung medemba aser tepsetba ken o nung tai tonglokja pa tepuokdak ayu.

Tetsürla samaba sülen anogo ishika lir Wangkhei Loumanbi Loukol nung nalah ka nungi la indang tasüman angu.

Hombarnü Manipur Chief Minister N Biren Singh-i Thoudam Jibal Singh den ajurutepe aser Forest Department nung mapa ka agütsütsü nangzüik.

ULFA(I)-i Arunachal nung totzü atsüdak amaksü amokmerener

Itanagar, January 5 (Agencies): United Liberation Front of Asom (ULFA-I)-i Arunachal Pradesh nung Oil India dena oil installations amaksü osang metetdaksüogo.

"Quippo Oil and Gas Infrastructure Company dangi

sen meshia aiben phone süogo" ta Changlang Deputy Commissioner, Devansh Yadav-i ashi.

OIL otongdar kati ashiba agi parnoki khuret tulu kecha ajurua mali aser security akangshiogo. Arunachal Pradesh kübok

Changlang district nung December 21 nü totzü company ka nung inyaker PK Gogoi aser Ram Kum na apu pur ao aser iba atema ULFA(I)-i tenüng agia metetdaksüogo.

Tena chiokdaksütsü atema bushisüngdang ka südar.



Assam nung ASHA workers-i January 6 nungi tenzüker hopta ana lungkak aittsü sentong renemogo. State sorkari parnoki ahangba atema telangzüba magütsüba ajanga lungkak aittsü ta Sadou Asom Asha Karmi Santha (SAKS)-i metetdaksüogo. State sorkari telangzüba tajung magütsü tashi ASHA workers-i mapa meinyaksü. (Guwahati, January 5)

Mizoram nung Covid-19 agi shiranger 98 % taneptsü nguogo

Aizawl, January 5 (Agencies): Mizoram nung Covid-19 aliba puteter nisung 98% tashi taneptsü nguogo, ta state health department ketdangser kati ashi.

Mizoram nung nisung 4,223 dak Covid aliba puteta liasü aser tang parnok 68 anepaludar, ta paisa ashi.

Nisung 68 rongnung Aizawl district nungi nisung 35 aser Lunglei district nungi nisung 17 lir.

Maneni, Lawngtlai district nungi nisung 8, Serchhip district nungi 4, Kolasib district nungi 3 aser Hnahthial district nungi ka lir.

District 5- Siaha, Champhai, Mamit, Khawzawl aser Saitual nungbo Covid-19 agi shiranger ka danga mali kümogo.

Mizoram nung Covid-19 agi shiranger nisung 8 tashi asü. Deobar tashi nung sample 1,81,351 tendangogo.

AR-i Manipur nung kozü aika apu



Imphal, January 5 (Agencies): Assam Rifles sepaitemi January 4 nü Manipur nung truck gari ka nung ozüangi memeleba khu bena aliba apu.

Assam Rifles-i Chandel district kübok Madonching tesem nung kozüjang tonne 2.5

shi bena aliba apu ta osang ajanga ashi.

Truck gari nung bosta 25 nung kozüjang bena liasü aser Rs 13.75 lakh alang liasü.

AR sepaitemi nisung ana den kozü apuba ajak Molcham Police Station (PS) ket nung agütsüogo.



January 6, 2021 nungi India aser Myanmar tsüngda Sagaing region nung border trade tenzüksü. Covid-19 wara adokba sülen yaküm March ita nungi arrtsü nung international gate shibanga ayu.

Tripura nung Bangladesh nunger 12 apu



Agartala, January 5 (Agencies): Bangladesh nunger nisung 12-i ozüng alema India telungi aitba apu.

Hombarnü parnok Tripura nung apu. Agartala Airport nung taila Aadhaar card bener parnok ya IndiGo tayimtsü ka nung Chenna-i aotsü lia apu.

Bangladesh nungertemji Agartala nungi Guwahati adena Chennai-i aotsü atema boarding passes meshidang IndiGo staff-i parnok indang taila Aadhaar cards putet.

Iba sülen Airport security-i

parnok apu aser Agartala police ket nung agütsü.

Parnok dang asüngdangya asüadang parnoki Tripura arrtsü adena Bangladesh nungi ozüng alema India-i aruba nangzüik.

Parnoki Sonamura subdivision nungi nisung kar ket nungi taila Aadhaar cards meshi ta police ketdangser kati ashi.

Tripura police-i iba ken o atema bushisüngdang ka tenzükogo aser Bangladesh nunger nem taila Aadhaar cards agütsürtem aputsü atema bushiteper.



TIR YIMYIM YIMOBILEM (EDITORIAL)

DIMAPUR RASEMNÜ, AENJETI (JANUARY) 06, 2021

MEKÜLAOKDAKTSÜLI

Asenok rongnung külakoktsüba indang jembidang, jet ta tangari asen külakoktsüba indang dang bilema arur, ajisüaka külakoktsüba mapatem rongnung tamajungtibaji asensasa asen külakoktsüba mapatem asütsü. Ibaji kodang asenoki jungjunga repringdangdir, tang ama mapa inyakdak terepranger mali inyakdang aser kaketreju tonga mao kidang nungi dang angazükba mapang ya nisung aika asoshi peisasa pei külakoktsüba mapang ka amato küma aoba repringtettsü. Asenok nisung shia taküm ya jungjunga bilemdangra, asen kija masü, asen ya nisung anana amai lir, kechiyong mapang aser mapa ajak nung asen o asen na jembir aser telemtetba agir. Ashiko, aji asen tanüla o asen shi temang na asütsüa akok. Ibaji tesümgangtsüka lir. Aji oda, aiben asen tanüla mesüra temulungjangi asenok dang majung aser meshitak inyaksü ajungshir. Asenok asoshi tatidangji aji lir. Item ama asen tanüla mesüra temulungjangi asenok dang meshitak aser majung inyaksü ajungshidangji 'ma' ta shitettsüsa asenok dak tangatetba tashi itta alitsü nüngdaker. Iba jagiang tamajung mapatem nungi pilabajiang tangatetba ta Yob 28:28 nung shia angur. Tetezü, tangatetba melira asen tanüla mesüra temulungjangi meshitak aser tamajung inyaksü ashibaji asenoki melamelaa 'hai' ta shiadoktsü aser inyaksü. Iba jagi aiben asen taküm nung tesusatsü mapatem aika ataloker. Tanü Covid-19 agi kangshiba mapang nung ya asenok aikati pei teinyaktsübo meinyaker ser inyaker ama tangar tsüngdangbo sayuba mapatem aika atalokdar asütsü. Item rongnung takoksa tulutiba angutsüba mapa kaji, kaketshirtem kaketreju tonga mao ser online nung dang tatidang agütsüba sentong nung kaketshirtem aikati pei melen tangar nem züludaktsüba mesüra kaket nungi ajizüka züluba mapatem asütsü. Tanü asen lima nung zünger mapa manguba tebilemtsü ya, talisa, tazüngbo azüng saka jungjunga mazüng, anungji degree-bo lir saka temetetba mali ta asüba timtem nungi akümba tebilemtsütem tuluba lir. Itemji kar kaketshiba mapang kaketejui junga mao aser kaket junga mazüng ser ajizüka züluba mesüra tia agi anarongdena takok anguba purtem asütsü. Tang ama mapang ya aiben asen tanüla mesüra temulungjangi mapa meinyakyonga inyaker ama Whatsapp nung noksa agir yokang ta jembitsüa akok mesüra kecha mapa bolua lesson tebusi, tesayur tanüker maliji kaket nung ajizüka langzütettsü nung koda (?) ta ajungshitsüa akok. Itemji tanganütsüka, kechiyong kecha mebelemi takok tajung angutsüba lenmangtem sayur. Ajisüaka, ibaji asen taküm lia aotsü atema timtem ajurudaktsütsü asoshi külakoktsütsü merangba sentong ka asütsü. Yeremia tapu 17:9 nung ashi ama, ajak dang temulungjangsa tekülakba aser tamajungtiba. Ibaji tangar masü asen mulungjang lir. Iba mulungjangi tangar külakoktsütsü ajungshir masü asen asensasa asen taküm aser kibong ashioktsütsü ajungshir. Iba kasa mulungjangi ashi angaba ajanga kibong aika raksaogo aser taküm aika, joko, shia marutettsüsa yi agi aser mozü agi raksatsüogo. Shin o nung ashi ama, aseni alima ajunga koknura, tamasa aseni asen akoktsüla. Asenok aikati o agi tangarbo akoker saka aseni asen makoker, iba jagi asen azükaru masür. Atangji, asen mulungjang ya kanga majung saka ano kasa mulungjang nungji tajung aser tamajung bendangtettsü shisatsü agüja lir. Iba shisatsüji amshia asenoki kodang asensasa asen den jembidir, koba agi asenok akoksatsü aser koba agi asen ajangzüksü, aji meteta telemtetba agiettsü. Atangji, asen dak aliba shisatsüji aseni mangur aser mekongshitetter saka Yob 28:28 nungsa ashir, Tsüngrem tsübubaji Shisatsü. Asenok ya nisung dang asünungji, langka ka tsübuba agidang aibelen masütsü aser tamajung meinyaktsü. Aji oda, asenoki tsübutsüba tangar shinga masü saka Tsüngrem lir. Iba tangatetba nung asenokbo Tsüngrem tsübudi aser asen tanüla aser temulungjangi kechikomaka tamajung aser meshitakleni anitsü merangdir merangaka, kodanga, asenoksasa asenok mekülakokdaktsüi, kechi shitak aser kechi tim, koba ochi aser koba teindang iba mapa aser iba lenmangji dang shimteta aotsü merangdi.

OLEMSABANG

YISU NÜTSÜNGTEM POLITICS ASER NAGA NUNGER POLITICS

~ Wati Longchar, Serampore

(Yashi adok nungi...)

TASHI, RONGSEN ASER KHONANG TSÜNGREM KÜMDAKTSÜBA AGI TELEMSA

Tanü Naga nunger rongnung amai, Yihuda nungeri yimden yimsüsüba nung tashi amshiba, miimechia ochimashi leman ajanga rongsen bendenba aser khonang Tsüngrem kümdaktsüba ajanga telemsa aika adoka liasü.

- Kari Yihuda nungeri benshia aruba yimsüsüba yimden yasa tajungba aser meindoki benshitsüla ta angatet. Chuba yimsüsüba menden, temaba putir, putir tatongsen aser tsüzüng-ozüng meindoki amshidaktsütsü? takhangba liasü, saka Rom nungeri yimsüsüba tashi magütsü. Rom yimsüsüri mulungba aser ashiba dang inyaksü mela (Tanü nung yimtsüng samen menchen/putu menden o Nagaland sorkar inyakyim den medemdangtsü akok).
- Kari Roman nunger ya ainer, tashiyim agi arakmoka (empire) yimsüsür telok. Yongji Rom nunger sepai aser yimsüsür tsükchir amai bilem, süngyangu külemertem, Yihuda yimsüyimpong aser sobaliba menentsür/raksatsür telok ta aitsü. Parnok anema raratsüla, aser parnok atsüngdoker külen Yihuda yimli yangertsü ta angatetba nung kiralongra telok aika adok. Parnoki nüjiso asoshi noktak saka sen meimba, tashi toktepba ajanga parnok rongnung temulung melemtep aser tsükchitep adok (Naga nüjiso bushir rongnung tila mekümtetba, rongsen arishitepba agi telemsa adokba aser parnok rongnung azü tokshitepba, Indian army den raraba den medemdangtsü akok).
- Kari Rom yimlijji kanga tulu, tesashi aser parnok anema raratsü tamakoktsü. Parnok kübok tashi angaa ali nung dang yimjung aser terenlok angutsü. Rom nunger den teka amteper aotsüla ta noktak. Parnokji Rom nunger den teka amteper inyakerem, Yihuda nüjiso asoshi ashioktsür ta aija, kiralongrari pur bener oa merenshi, tepsettsü amokmeren, senchi meshi, aser karbo nüburtem tsübudaktsütsü? asoshi lenjem nung tepseta yutsü (Naga lima nung lenir aika telungpuri nüjiso tenüng nung aika kaseta indokogo, {tat. agi Dr. Imkongliba ama}, kasetettsü merangogo, {tat. agi Dr. SC Jamir ama} aser warning agütsüogo - Naga lima den medemdangtsü akok)
- Rom yimsüsür, Rom nunger den teka mtepa inyaker, Rom nunger anema kiralongrar telok balala ajaki nüburtem dang sen saru. Tax meshiba agi nüburtem talitsümüjungi aküm; Yisu mapang 55% tax balala agütsü ta ashir, sensaker aika taya agi asütsüsa aküm. Anungji, nüburtemi alu mayimtsü, ango maputsü, rong amshiba saru, tzüym nung ango aputsü melaba saru, magutsütsü, san memetsütsü, kilen saru, shishilembaba, lenmang nung jajaba tax amala aika magütsütsü ta apuso. Anungji ali melen sarur aser putir ket nung sentsüh züludenba kaket rakzüka rongdoktsü. (Naga lima nung corruption den tax - multiple tax agi tali majunger - Nagaland tensa den medemdangtsü akok)

Item ajak teraksaji ochimashi, sen meimba, mang yangtepba, kati ka taoba ta mebilemba, temeim makaba, tashi amshir yimsüsür ajanga adoktsüba lir. Yimsüsür dak ajemalu, nübur meimba tanela makara alimaji kodanga tejakleni aotsü makok. Ochishir, alima meimer shimtsü asü, sen meimer aser khonang bushir shimtsü?

TENZÜDKAKTSÜTSÜ MASÜ, TENZÜKTSÜ SHIMTETBA YIMSÜSÜR

Yisu-i nütsüngtem dang ashi "nenok rongnung shibai tulu kümnür, pa nenok tenzüker asütsü" ta ashiba ya kanga tongtibang. Yimsüsür kaji shitakba agibo nübur tenzüker ka lir. Tenzüker mesüra tenzüka ta asüba nungji tila akümba, ajemalu, tulu-tila ajak den saku litetba, khuret abenba, alii lua tenzüktetba, aroki inyaksü jangraba; ozüng metetba dang masü, nübur nungdak angatetba, maka-maiter yariba, tular-tilar ta tebandang mali ochi inyakba, ajak den yimjung nung litetba, süpokrem magiba, kalem kiraka miimechi mapa meinyakba ajakji dena lir. Nübur tenzüksü shimtetbaji maongka tulu, saka khureta tulu ta angatettsüla. Lokti tenzüksü khuret nongloksü, shimtet ta mangateti ni yimsüsür, ni alema shinga mali, ni bushia arua sahib ta ajatsüla, ni dang metet aser ni ashiba angatsüla ta asüküma yimsüsüba menden nung amen nungbo alima dangi teraksa dang bener arutsütsü. Item amala yimsüsür dangji tenzüksü shimtetba yimsüsür ta ajatsü makok, saka tenzükdaktsütsü shimba yimsüsür ta ajar. Anungji tenzükdaktsütsüba masü saka "tenzüksü" shimtet ta Yisui par nütsüngtem dang sayuba angur. Tanü yimtsüng yimden yimsüsüba nung süang, Nagaland sorkar yimden nunga süang, nüjiso bushir telok nunga süang, temulung melemtep adokba, azü dokshittepba, tila mekümtetba, akhang akhang yimsü mesütetba ya sen, tashi, aser khonang bushiba ajanga adoker ta angatetdi.

Koba lima nung terenlok maka, rongsen lemansadema mali, lanur asoshi mapa peria mali, iba lima nungji kiralongrar, ashi-külaker, auür aser rakzükraktere aika adoktsü. Tia maka, Nagaland state ngur nungi tanü tashi nung nüburtemi akhümtsübuttsüsa tejangja charismatic leader, ni Naga nunger tejakleni odaktsütsü taküm tenla agütsütsü ta aser iba mangdang ya atalokdaktsütsü ta tasü ita noktakba yimsüsür aika mangur. Nagaland state ngur yimsüsüri Nagaland terenlok mapa nung temulung agütsü asübo tanü kiralongra paikati madoki lila. Taoba mapang yimsüsürtem aser tang tata memden nung mena alirtem aikati pei ajungtsü dang bilemba aser mangdang akaba lenir aika maliba ajanga tanü Naga lima iba jenjangi bener arutsü. Tanü loktii mulungba yimden yayim aser meyongnem yoktep nungbo Naga nunger tejakleni kodanga moutet. Iba den nüjiso bushir rongnunga nübur, alima meimer masü saka rongsen meimer onsara. Tema nung alir yimsüsür, tular aser telong nung alir na som sür ochimashi aser miimechi mapa jenti inyakba aser lokti terenlok kecha meinyaktettsüsa tashiyim agi sen saruba aser meyimprong agütsüba angur. Naga nunger asoshi ibai aiatai mapa ka aser anentsüla. Ochi shia nübur yimsü mesütetba ajanga India nung state ajak rongnung teküboktiba jenjang nung Nagaland lua lir. Tanü pei ajungtsü dang bilemba, lokti terenlok sen auyar, tashi arishiteper, ashioktsüteper, nükmeremer yimsüsür nungdak mali. Nüjiso bushir teloka kecha mapa mali tax, tax, tax dang sarua chia aliba telok nungdak mali. Tenzükdaktsütsü akhangba aser ochimashi inyaker yimsüsür ajanga alima dangi temelenshi bener marutsür aser loktiliba rajang kümdaktsür ta metettsüla. Tenzüksü jangraba, nukla tajung aser ochi aser nübur meimer shimdi. Item jakla akettsü yimsüsür moajang ta sarasademtsü nungdak.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**



December 24, 2020 aonung New Delhi nung aliba Sacred Hearth Arogo Tenla kima Khristan kati light tsüklokba sülen sarasademba noksa nung angur.

India nung Khristan aikati online ajanga dang Khristmas sentong nung aden

January 05, 2021: India linük nung Khristan nütsüng million 32 shi lir, aser Khristantem timbakati online ajanga dang Khristmas sentong nung aden.

Tang India linük nung coronavirus wara anema tenokdangbatem aliba aser state aikati Tenla kidang nisung 50 dak tema madenshitsü tuyuba ajanga Khristmas tekülem sentong nung Khristan aikati medenteti liasü.

State balala nung sorkartemi Khristantem dang Khristmas aser New Year sentong nung lokti madenshitsü tuyua liasü.

Maharashtra state nunga ketdangsertemi December 22 nungi tenzüka January 5, 2021 tashi aonung shia ghonda 7 curfew ozüng benoka liasü, aser Mumbai nungbo moapu nung Khristantem tekülem sentong agitsü memelaba dang masü saka Tenla kidangi nisung ishika dang adenshitsü temelaba agüja liasü.

Iba dak alia Tenla kidang tekülem sentongji aonung 8:00 ako tashi nungbosa tembangtsü ketdangsertemi jelia metetdakja liasü.

Osangbener den jembidang Arogo lenir kati, "Takümba wara ajanga benjung mongpu nung timtem agütsüogo.

Tekümdangtsü sangdongba ama onoki tashi angatsü," ta metetdaksü.

Tenla kidang nisung adenshiba nokdangyonga state nung restaurants, pub, clubs aser resorts bo lapoktsü temelaba agütsü.

Iba denji kasa India kübok Khristan nütsüng aika aliba tesem- north-east state tem nunga Tenla kidang nisung telatet ka dang adentsü melaa liasü, saka Arogo aika nung Khristmas sentong aser Küm Tasen sentong ayongzüka agiogo.

K e t d a n g s e r t e m i Khristantem dang local cable channels aser social media ajanga sentong balala reprangtsü tuyua liasü.

Shillong Presbyterian Arogoibo local TV cable network ka den longjemer aonung shia sayutsüngiba sentong yokogo, ta Rev. John Mudur-i metetdaksü.

Himachal Pradesh nunga Anglican Christ Church densema Arogo aika nung akhi ama aonung Khristmas tekülem sentong magi, ajisüaka Khristmas anogo nung anepdang sarasadem sentong ana ayongzüka agiogo.

1857 küm yangluba Anglican Christ Church Tenla

ki ya northern India nungbo Tenla ki tulutibatem rongnung tanabuba lir.

Raliwalirtemi kanga sapua semdangba state- Goa nung küm shia Khristmas mapang kanga longsoa benjungteper, ajisüaka tawa Khristmas mapang nungbo raliwalirtem kanga ajemer liasü. Goa nung nütsüng shilem 30 bo Khristan nütsüng lir.

Goa nung Arogo lenir, Walter D'Sa-i, "Onok meyong Tenla kidang nisung 100 tashi dang melatsü. Sarasadem sentong nung nisung aika dentettsü atema onoki Khristmas anogo nung sarasadem sentong tali asem ayongzüka agitsü," ta metetdakja liasü. Iba dak alia par Arogo nung teintet sensotem atema temeja sentong ka ayongzüka agi.

India nung nütsüng timba aliba tamangba yimsü anaji Hindu aser Muslim na lir, iba sülen tasembuba jenjang nung Khristan yimsü lir. India nung Khristan nütsüng million 32 dak tema lir aser ibaji linük nung nütsüng shilem 2.4 lir.

India nung coronavirus case million 10 dak tema jungogo aser anogo shia nisung meyirjang 24 tema dak iba tashidak puteta arudar.

UP nung Khristan yimsü dangi meyipdaksütsü meranger nisung 5 apu

January 05, 2021: Hindu nungertem Khristan yimsü dangi meyipdaksütsü merangba atema Shahjahanpur police-i nisung pongu anema FIR benokogo; par pongu nungjagi nisung anabo Tamil Nadu nungi lir, ta police osang ka ajanga metetdaksü.

"Iba ken o nung tang tashi nungbo nisung shinga mapu. Par pongu rongnung nisung anabo Tamil Nadu nungi lir. Kulitem bendenba nung ajemdaker tai tonglokja alirtem aputsü," ta Superintendent of Police (Shahjahanpur), S. Anand-i metetdaksü.

Police-i ashiba agi, Khristan pongu jagi Hindu nungertem dang parnoki Khristan yimsü dangi meyipra parnok chirnurtem nem mapa aser shisaliok tajung agütsütsü ta nangzüka liasü.

Uttar Pradesh Prohibition of Unlawful Conversion of Religion Ordinance, 2020 Act kübok tai tonglokja alirtemji Tamil Nadu nungi David aser Jagan na den Shahjahanpur nungi Rajat, Ajay aser Shirish Gupta nungir lir.

Nisung ka tenüng agi Ram Lakhan-i police dang, anogo 10 tejaklen nisung kati pa dang sarasadem sentong ka

nung adentsü atema Vikas Nagar Colony nung aliba ki kati arung ta metetdakja liasü, ta ashi.

Amongnü pa iba kiyong jagi oa Shirish Gupta'er ki atongba mapang nung kidangji tetsür aser tanur densema nisung 30 shia liasü. Iba sülen nisung kari parnok dang, nenok nem mapa agütsütsü aser shisaliok tajung agütsütsü, anungji Khristan yimsü agizükang ta mepishi, ta Ram Lakhan-i police nem metetdaksü.

Kobi melii Hindu nungir telok ka aruba sülen par pongu pua police station-i anir ao.

ANOGO ABEN TSÜNGREM DEN

Tamang Medeni

Rom 14:23

Ibri shiti züluri tamang meteni Tsüngrem peladaksütsü makok ta bilemtetdaksür (Ibri 11:6). Kodangsa Tsüngremi langka jungkai adokdaksüdir, asenoki pa amangtsü aser asen taküm den medemdangtsü pai imlar. Iba tetezü kechi? Iba tetezü asen nüngdak ajak pai agütsütsü ta amanger kechiaser asen nüngdak Pa dang ashitsü Pai asenok dang sayu (Fil. 4:6). Iba tetezü asenok kija ta shisa mebulutsüla kechiaser Tsüngremi asenok kodanga metoktsütsü ta nangzük (Tazüng 31:6). Iba tetezü taküm nung kechi atalokdir atalokang asenoki Tsüngrem temeim nung kodanga marendaksüla kechiaser teti tatem maka temeimi pai asenok meimer ta pai asenok dang ashir (Yr. 31:3).

Asenoki asen tamang makaba temeten bushir. Asenoki Tsüngrem tenangzükba metetta lir saka asenoki arendaker. Mepet mesü mapang nung asenoki mejungi bilemer aser kuli agütsür. "Tsüngremi iba nungi kechi tajung madodaksütsü!" Asen nüngdak nung asenoki asen meketa alir ajak dang teyari meshir aser rasaa ashir: "Tsüngremi kü nüngdak ajak agütsür ta ni metet, saka ni akokba tashi ajak ni inyaksüla ta bilemer," Tsüngremi iba dang tamang makaba ta ajar. Tamang makabaji temenen. "Saka tamang meteni Tsüngrem peladaksütsü makok" (Ibri 11:6).

New Year anogo nung China nunger sayutsüngir Wensheng apu



China kübok Hunan province nung lenmang nung sayutsüngia senzür Evangelist, Chen Wensheng noksa nung angur.

January 05, 2021: China Zhengxiang Branch, kübok Hunan province nung Hengyang City Public Security Office sangdong ka ajanga lenmang nung sayutsüngia senzür Khristan ka apuba sülen pa anogo ter tashi pua ayutsü obendang agütsü, ta International Christian Concern (ICC) osang ajanga metetdaksü.

December 31, 2020 aonung Chen Wensheng-i lenmang nung sayutsüngia senzü; pai lokti nem timtem agütsür, ta pa nem tai tonglokja sorkar ketdangsertemi pa apu.

Chen Wensheng ya Hengyang nung aliba Xiaoqun Arogo nung züngsem ka lir, aser yaküm August ita nunga pai ozüng alema sayutsüngia senzüba atema pa pua liasü.


Taoba mapangtem nunga pai sayutsüngiba atema ketdangsertemi pa aiben puogo, ajisüaka pai maneni yimti yimdong lenmang nung senzürtem den Khristan osangtajung lemsateper.

Zhengxiang Branch, Hengyang City Public Security Office sangdong ka ajanga ashiba agi, December 31, 2020 aonung 11:00 ako meta Hengyang yimti kübok Pedestrian Commercial Street area nung Chen Wenshing aser Zhou Long nati sayutsüngiba den külemi Khristan kaketterem lema senzüa liasü. Iba sülen tenati hospital kati oa mamen sayutsüngiba den Khristan kaketterem lemetsü.

Iba mapang nungji public security bureau-i tenaprongla apu aser Chen anogo ter tashi Hengyang City Detention Center nung ayutsü atema obendang agütsü.

China linük temzüng ajanga tamangba yimsü ajak sadoka amangtsü temeden agütsür, ajisüaka atangji nungbo Communist Party sorkari tamangba yimsü balala, talisa Khristan yimsü aser Islam yimsü na anema inyaker.

OLONG PAITEP # 5685



TIPIEN

2. Sü jeplok
4. O agi merenshi
7. Ayongküm li
8. Chiyungtsü mapang süiadok
9. Tsüngrem den jembiba
12. Saklok
14. Samaba mebushitet
15. Mejanga onü
16. Tzü shiruru ka

LANGTSÜNGLEN

1. _____ i
3. Kasa masü
5. Nüchi masü
6. Tashi endok
9. Langtem
10. Anü malidang
11. _____ kibur
13. Tebur tembar tsüngda
jatepba


OLONG PAITEP # 5684 TELANGZÜBA

TIPIEN :

1. Lemsä, 3. Osang, 5. Mezüng,
6. Agi, 7. Süra, 8. Tebutem,
9. Amen, 12. Odi, 13. Asayar,
14. Angsü, 15. Agima.

LANGTSÜNGLEN :

1. Lamen, 2. Sangken, 3. Omen,
4. Asüküm, 7. Sendong, 8. Tejang,
10. Tanga, 11. Tazü.

Agüja aliba noksa nung meputepi aliba
10 bushiang

TANÜBO NAI LANGZÜANG

Q. Bhabha Atomic Research Center (BARC) headquarter ya _____ nung amenoka lir.

- A. Chennai
C. Delhi

- B. Mumbai
D. Kolkata

===== (Taruba adok nung onoki langzünsü)

YASHI ADOK TELANGZÜBA: 1963



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.

Tepela
Tasoba Anogo



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

NAI-A YA METETTER MA?



Egypt nung Spa kati nisung temang nemshitsütsü atema per tapu balala 28 aser ngüm tem amshir. Osang ajanga angazükba agi, temang nung per juzüdakja temang nemshidaksüba ya tajangzük lir, koba teret teloktep ayangba aser temang ayangashi nungi taneptsü aser anisüngzük angur. Cairo nung lapoka aliba spa kibur tenüng Safwat Sedki lir aser pai meim maketba per tem amshia temang nemshitsür.

SUDOKU # 5726

				6	4		8	2	7	8	3	6	1	2	5	4	9
8					3		4	1	2	1	9	4	5	3	6	7	8
9							6	5	5	6	4	9	7	8	3	2	1
3	7	5	8	1	9				1	5	7	8	9	6	4	3	2
	8		3	4	7				6	9	2	7	3	4	1	8	5
4	1							3	4	3	8	5	2	1	9	6	7
				2					3	7	1	2	4	9	8	5	6
	6	8		3		4			9	2	6	3	8	5	7	1	4
7	5					2	9		8	4	5	1	6	7	2	9	3

TELANGZUBA # 5725

OJANG LUTEP # 5273

- MBTEAR : [][][][][][][]
YTSONGÜ : [][][][][][][]
NGNU : [][][][]
ÜREMTAZK : [][][][][][][]
AKAMI : [][][][][]
NGTETOKPDA : [][][][][][][][]
NGATAR : [][][][][]
ZÜANGTAJK : [][][][][][][]
SAGUTANSÜ : [][][][][][][][]
ÜMEAKR : [][][][][]

OJANG LUTEP TELANGZÜBA # 5272

ALIMAJI KOMAKA MELENSHIA RENLOKA AOYONGA
PEI SOBALIBA METETA ALITSÜMETETTSÜLA



National Media Centre, New Delhi nung Toycathon 2021 amenokba sentong nung Union Education Minister Ramesh Pokhriyal Nishank aser Textiles and Women and Child Development Minister Smriti Zubin Irani nungeri shilem agiba noksa nung angur. Official osang ajanga ashiba agi iba sentong ya school aser college tem nung kazütsütem pedagogical tools ama amshitsü atema ajungmesotsü asoshi liasü.

India nung Covid-19 UK strain nisung 20 dak potet

New Delhi, Aenjeti/January 5 (Agencies): India nung coronavirus tashidak tapu tasenba nisung 20 dak potetba sülen, iba tashidak menar alir nisung 58 jungogo.

Case tasentem ya National Institute of Virology (NIV) Pune nung puteta liasü. "UK nung mezüing potetba novel coronavirus tapu tasenba mena alir nisung 58 jungogo," ta Union health ministry-i ashi.

Tashidak potetertem ajak pei state sorkari Health Care facilities balala nung lokti nungi pilaa takdang balala nung temang anepaludar.

Parnok den ajuruteper alirtema quarantine nung tokja lir. Parnok den külemi sen z ü sen p o n g e r t e m , kinungertem aser tangartem jangjatsü atema jenjang tapet agiogo. Tanga specimen tem nung Genome sequencing dang tagidak lir, ta ministry-i ashi.

Tensa kanga kümdanga meita atadar aser state sorkartem nem surveillance inyakyim ajungkettsü, tashidak azüoktsü asoshi jenjang balala aser iba den tashidak tendangtsü aser INSACOG lab tem dangi samples tem yoktsüba dak sendakba nung tetuyuba mapangshia agüja arudar.

Tashidak poteter alir 58

rongnung parnok ti National Centre for Disease Control (NCDC), New Delhi, Institute of Genomics and Integrative Biology (IGIB) Delhi nung 11, National Institute of Biomedical Genomics (NIBMG), Kalyani (near Kolkata) nung ka, National Institute of Virology, Pune nung 25, Centre for Cellular and Molecular Biology (CCMB) Hyderabad nung asem and National Institute of Mental Health and Neuro Sciences Hospital (NIMHANS) Bengaluru nung ter poteta liasü.

NCBS InSTEM, Bengaluru, CDFD Hyderabad, ILS Bhubaneswar, aser NCCS Pune nung INSACOG lab tem nung tang tashi nung mutant virus ka danga poteta mali.

UK nung poktetba tashidak tapu tasenba ya Denmark, Netherlands, Australia, Italy, Sweden, France, Spain, Switzerland, Germany, Canada, Japan, Lebanon aser Singapore nunga potetogo.

UK nung tashidak tapu tasen ka poktetba sülen India sorkari süoki ia agi aser iba tashidak potettsü aser azüoktsü atema jenjang tapet agiogo, ta ministry-i ashi.

Jenang agibatem rongnung, UK nungi aruba tayimtsü tem ajak khen atema December 23

nü nungi January 7 nü tashi mesenzüdaksütsü telemetba agi aser UK nungi arurtem ajak RT-PCR test agitsü tetuyuba agüja liasü.

UK nungi arur shirnok dak RT-PCR test ajanga tashidak potetogo, parnok indang sample tem ajak sorkar indang lab 10 nung genome sequencing asütsü.

Maneni passenger shirnoksa India-i December 9 aser 22 tsüngda aruogo, parnok dak tashidak keta aliba temaitsü sayura aser Covid-19 tashidak keta aliba potetra UK nung potetba tashidak keta ali mali jangjatsü atema parnok indang sample tema genome sequencing asütsü.

Iba sülen state aser district surveillance officers temi maneni parnok asadangtsü aser ICMR guidelines dak ajemdaker anogo 5 nungi 10 tsüngda tashidak tendangtsü, ta genomic sequencing dak sendakba nung Union health ministry indang guideline nung shia lir.

Ano November 23 sülen India-i arurtem ajak epidemiological surveillance agitsü. Maneni iba tashidak nokdangtsü atema December 22 nü state aser UT tem nem standard operating protocol agütsüogo.

Kerala CM-i gas pipeline project tembanga yanglutetba atema tenüngsang agütsü

Kochi, Aenjeti/January 5 (Agencies): Kerala Chief Minister Pinarayi Vijayan-i Mongolbarnü GAIL indang Kochi-Mangaluru natural gas pipeline takok nung tembanga yanglutetba atema tenüngsang agütsü aser ashiba agi, project koba tetsükdaktsü aika ajangshia liasü, iba ya par sorkari election magi tsüngda nangzükba maparen tongtibang rongnung ka liasü.

Tetsükdaktsü aika aliba ajanga 2014 kum September ita GAIL-i maparen anena atatsüsa akum ta shia Chief Minister-i, km 450 talang pipeline lapoktsü atema 2016 kum par party-i sorkar

kümtetba sülen tetsükdaktsütem ajak bentetogo, ta ashi.

"Iba project takok ngua inyaksü atema GAIL-i onok nem teyari agütsüogo. Onok longjemer inyakba ajanga süngjang tajung tangtetba atema ni kanga pelar," ta pai ashi.

Ato Kilonser Narendra Modi-i, Kochi aser Mangalore na tsüngda iba natural pipeline ya virtual sentong ka agia lapoktsüogo, kong Kerala aser Karnataka Angh aser chief minister, Union Petroleum Minister Dharmendra Pradhan, aser GAIL nungi ketdangsurtem dena liasü.

KM 450 talang pipeline yagi Kochi nungi Kerala-i,

Ernakulam, Thrissur, Palakkad, Malappuram, Kozhikode, Kannur aser Kasargod district tem aser Karnataka nung Dakshina Kannada district kübok Mangaluru tashi natural gas abentsü.

Iba pipeline takok nung tembanga yanglutetba ajanga Kerala aser Karnataka sorkari maparen ajak nongita yariba tatishitsü sayur.

Ketdangsurtemi ashiba agi, iba pipeline ajanga tzi-mopung nung timtem magütsüi tesem balala nung ki, commercial units aser compressed natural gas (CNG) nem sen jenjang dalang agi piped natural gas (PNG) tanen makai agütsütsü.

SC-i Central Vista project atema temelaba agütsü

New Delhi, Aenjeti/January 5 (Agencies): Union minister Hardeep Singh Puri-i Mongolbarnü, Central Vista redevelopment project atema Supreme Court-i obendang agütsüba pelashishia agizükogo aser ashiba agi, environment dak sendakba nung sorkari ken o tem teti süoki ia agir.

Union housing and urban affairs minister-i, sorkari kiojen ajak jenjang temaba nung yanglutsü ta ashi. Puri-i aniba ministry-i iba project achaayanger.

"Delhi ya World Class capital city ka küma odar aser 2022 kum linük nüjiso ngur kum 75 ajungba mapang Parliament ki tasenba renemer alitsü aser iba ajanga India tasenba sayutsü," ta Puri-i tweet asü.

Supreme Court-i Central Public Works Department (CPWD) shirnoki iba project achaayanger, parnoki sen crore 11.794 intoka yanglutsü benoker aliba crore 13,450 küma yanglushiogo.

"Central Vista Project inyaksü atema Supreme Court-i obendang agütsüba pelashishia agizüker. Centre sorkari environment dak sendakba nung ken o tem teti süoki ia agir aser maneni ki temaba jenjang nung yanglutsü," ta Puri-i tweet ka ajanga ashi.

Central Vista redevelopment project kübok triangular Parliament building ka, ajak atema central secretariat ka aser Rashtrapati Bhavan nungi India Gate tashi km asem talang Rajpath lenmang yanglushitsü densema lir.

Sorkar osang ka ajanga ashiba agi, Central Vista redevelopment kübok Ato Kilonser indang complex nung four-storey buildings 10 (12 meter talang) yanglutsü sentong lir.

West Bengal sports minister Laxmi Ratan Shukla-i mapa toktsü



New Delhi, Aenjeti/January 5 (Agencies): Mamata Banerjee atema takoksatsüka West Bengal minister of state for youth services and sports Laxmi Ratan Shukla-i Mongolbarnü pa mapa toktsüogo, ta state secretariat nungi source kati ashi.

Taoba mapang cricket asaya alisang yagi pa mapa nungi anenba shiti chief minister dangi yokogo aser kasa shiti copy ka Angh Jagdeep Dhankhar dangi yokogo.

State transport minister Suwendu Adhikari, Trinamool Congress (TMC) toktsür Bharatiya Janata Party (BJP) nung oa adenba sülen tang Shukla mapa nungi anenogo.

Arishi kum 39 tain taoba mapang Bengal Ranji team captain-i Banerjee dangi züluba shiti nung pa yimden yimsüsüba nungi anentsü asoshi bilema aliba lemsatep, ta ketdangsüri ashi.

Iba dak sendakba nung West Bengal CM Mamata Banerjee-i, "Nisung mashi ka mapa nungi anentettsü. Pai (Laxmi Ratan Shukla) pa saisapong atema mapa tali agütsüner ta shia shiti zülüogo aser maneni MLA ama inyaksü. Ken o mashiyimi tagi," ta ashi.

Shukla ya North Howrah

Assembly constituency nungi MLA lir, shibai Howrah district TMC inyakyim achaayanga liasü, ajisiüka pai MLA mapa metoktsü.

Source balala ajanga ashiba agi, Shukla tanga party nung adentsü tangsa tangbo kecha sentong mali. Pa yimden yimsüsüba maparen nungi anogo ishika anisüngzüktsü aser iba sülen telemetba ka agitsü imlar.

Trinamool lenir Sougata Roy-i ashiba agi, Shukla-i party den ken o kecha melemsatep. "Onoki ken o repringshimtsü," ta Roy-i ashi.

Kasa mapang nung BJP IT cell tekolakba Amit Malviya-i, Laxmi Ratan Shukla mapa nungi anenba osang Twitter ajanga lemsatepa laisü.

Paisa, TMC secretary-general Partha Chatterjee den senden amentsü aliba nung West Bengal forest minister Rajib Banerjee-i shilem magiba pai lemsatep.

Shukla 2016 kum Trinamool nung aden aser Bengal nung par party-i sorkar kümtetba sülen pa state sports ministry nung junior minister akum.

Pa, Howrah district pary tir asütsü taoba kum district TMC lenir tejen aser state cooperative minister Arup Roy melena shim.

Britain nung lockdown tasembuba tenzüker

London, Aenjeti/January 05 (Agencies): Britain nung Mongulbarnü nungi COVID-19 lockdown tasembuba tenzüker, kong nüburtem dang kilung nung alitsü ozüing agütsü aser nübur ajunga nem mozü agütsü metenzükdang iba virus azüoktsü atema tatemsa khen merangtsü sorkari akhanger.

February ita tatemlen nungi tenokdangba sala aodang nüburtem mapa nung maneni yutsütsü aser firm tem meshibangi alitsü atema Finance minister Rishi Sunak-i sen billion \$6.2 jenjang business grants tasen sangdongogo.

COVID-19 agi tamajungtiba kongshiba linüktem rongnung Britain ya ka lir, koba Europe nung iba tashidak agi nisung timtiba asüba linük tanabuba

jenjang nung lir.

Ato Kilonser Boris Johnson-i tenokdangba tasen ya Hombarnü menur sangdong aser Britain nung mezüing jangjatetba coronavirus tasenba ya kanga kera prokshia aor, aser anogo 21 tsüingta National Health Service lendongi aitsü akok, ta ashi.

England kisüing nunga nisung 27,000 shi COVID-19 agi meneper mozüki nung lir, koba April ita iba tashidak kanga sashia poktetba mapang dang kanga agi timba lir.

"Aruya aliba hoptatem ya tamajungtiba asütsü saka timtem mapang tatembangbai ayir amai ni amanger, kechiaser asen kabu nung mozü agi shia COVID nungi pila aor," ta Johnson-i ashi.

Britain nung Pfizer aser BioNTech nati yangluba mozü ka aser Oxford University o AstraZeneca nati yangluba mozü ka amshi tenzüker aser tang tashinung nisung million ka dak tema iba mozü agiogo.

Iba tashidak wara tenzükerba sülen United Kingdom nung coronavirus positive puteter anogo 28 tsüingta nisung 75,000 dak tema asü, ta ketdangsürtemi ashi.

England nung lockdown tasenba kübok school timba shibanger, nüburtem akok tashi kidang nungi mapa inyaktü, hospitality aser kanga tongtipang masüba dokan ajunga shibangsü.

Scotland, Wales aser Northern Ireland nunga kasa tenokdangba agüja lir.

Iran ajanga Trump densema US ketdangsür 48 aputsü metetdaksü

Tehran, Aenjeti/January 05 (Agencies): Iran-i Interpol ajanga US Tir Donald Trump aputsü osang ka agüja lir.

Iran indang judiciary odongtar Gholamhossein Esmaili-i Mongulbarnü osangbener senden ka nung jembiba mapang, taoba küm mitkar lenir Qassem Soleimani tepsetba maparen nung shilem agi ta jangjatetba sülen Trump aser America nunger ketdangsür 47 aputsü Iran-i international police organisation dang asüingdangogo, ta ashi.

"Iba mapa tamajung inyaktü atema totuyuba agütsür aser inyaktertem bushia merenshitsü atema Islamic Republic of Iran ajanga süoki ia inyaker," ta Esmaili-i osangbener dang ashi.

Soleimani ya Iran indang mitkar lenir ka liasü, shiba Islamic Revolutionary Guard Corps indang foreign operations arm nung tekolakba liasü, aser pa ya Trump-i totuyuba agütsür Baghdad nung US-i drone amshia January 3, 2020 nü amakdang tepset.

Soleimani tepsetba ya international law anema lir, ta Agnes Callamard, the United Nations Special Rapporteur on extrajudicial, summary or arbitrary executions ajanga züingshir.

Trump aser Pentagon nung US ketdangsür aser US Central

Command nung alirtem aputsü atema Iran-i alima dang mepishiba tan ya tanabuba alitsü.

June ita nunga Tehran prosecutor Ali Alqasimehr-i Trump aser US ketdangser ter dak tema aputsü temelaba agütsü aser parnoki nisung tepsetba aser kiralongra mapang inyaka lir, ta ashi.

Saka France nung amenoka aliba Interpol ajanga Iran-i mepishiba magizük aser par constitution ajanga yimtenren, mitkar, tamangba yimsü mesüra kin dak ajemdaker teka amuoka inyaksangshitsü nokdang, ta ashi.

Iraq nung America nunger drone ajanga amakba nung Soleimani tepsetba mang ayangtsü ta Iran nungeri nangzüka aliba nung shilem ka ama Trump aser danga US ketdangsürtem nem temerenshi agütsütsü atema jembishini tenzüker.

Trump-i January 20 nü US tir indang office toktsütsü mapang anasa lia parnoki iba ken o ya benoker, kechiaser pai iba tia ajurutsü maongka tajungba kumdaksütsü, ta Iran teimla lir.

Tehran nung Soleimani tepsetba bilemteta sentong ka agiba mapang judiciary chief Ebrahim Raisi-i ashiba agi, temerenshi agütsütsü atema Trump ya tongtipangba aser

yimtenren tsütsü pa jenjang nung ajemdaker kumzüka mayutsüla, ta ashi.

"Tia kaa Trump tir inyakba mapang tembangogo. Saka pa kümsük metembangaka, pa ketdangsüba jenjang nung ajemdaker ozüing küboki maittsü ta ashiba magizüktsü," ta pai ashi.

Tashi tait constitutional body, Guardian Council indang odongtar-isa, Trump-i White House yutsüba sülena Iran-i ken o maneni benoka jembitsü, ta taoba hopta shia liasü.

Trump ya linük ka nung tekolakba asüba ajanga pa anema ken o benoka jembitsü tasak asür, saka pa tir inyakba kümsük tembangba sülen takoktsü asütsü akok ta international expert kari ashir, ta Ali Kadkhodaei-isa ashi.

Soleimani tepseter küm ka ajungba mapang Iran aser US tsüingta tensa mejungi akumer.

Taoba ita US-i nuclear amshitsü akokba B-52 bomber tem Gulf alema ishíben süyidaksü aser iba region nungi Navy aircraft carrier ka bener aotsü lemteta aliba Hombarnü melenshi aser ibai Iran ketdangsürtemi timtem agütsüba ajanga lir, ta US-i ashir.

Ano külen US aser Israel nati Trump kümsük matemdang rara tenzüksü meranger, ta Iran-ia ashir.

Indonesia nung January 13 nungi vaccine agütsütsü

Jakarta, Aenjeti/January 5 (Agencies): Indonesia nung January 13 nü nungi tenzüka agütsü tenzüksü, ta linük health minister-i Mongolbarnü ashi. Southeast Asia nung coronavirus agi Indonesia dak tamajungtiba kongshir lir.

Iba sentong ya Jakarta nung tenzüksü aser tir Joko Widodo nem mezüingbuba shot agütsütsü, ta Budi Gunadi Sadikin-i ashi. Iba sülen tanga tesemtem nung vaccine agütsüba inyakyim anogo ana lir tenzüksü.

Sorkari taoba mapang, yakbang nung inyaker million 1.3 nem tamasa China indang Sinovac Biotech-i yangluba vaccine agütsütsü ta shiogo. Indonesia nem Sinovac vaccine; CoronaVac dose million 3 agütsüogo.

Health workers tem nem vaccine agütsüba sülen nüburtem nem temulung lema bilemdaksütsü atema regional governor tem agitsü," ta Budi-i ashi.

Linük nung food and drug agency (BPOM)-i jongdak vaccine amshitsü atema

temelaba magütsü tsüingda iba osang sangdongogo.

BPOM-i telangzüba kecha magütsü saka taoba mapang Indonesia, Brazil aser Turkey nung inyakyim asadanger temelaba agütsütsü ta shir liasü.

Sinovac den Indonesia indang state meyong mozü yangluba company Bio Farma-i, West Java province nung nung clinical trials agidar.

Minister Budi-i taoba mapang, herd immunity atongtsü atema Indonesia-i nisung million 181.5, mesera nütsüingyongsük shilem 67 nem vaccine agütsütsü nüngdaker, ta shiogo.

Vaccine ya angati agi agütsütsü aser ita 15 shi agitsü imlar.

Bio Farma-i Mongolbarnü tashi nung, Sinovac indang vaccines dose 760,000 dak tema Indonesia kübok province 34 dangi lemshio.

Indonesia-isa, COVID-19 vaccines dose million 329 dak tema mekazükogo aser item rongnung Pfizer aser parnok indang partner BioNTech aser AstraZeneca-i yangluba vaccine densema lir.

Raksar aliba temple hopta ana nung yanglutsü Pak SC-i tuyu

Islamabad, Aenjeti/January 5 (Agencies): Pakistan Supreme Court-i Mongolbarnü Khyber Pakhtunkhwa province sorkar dang Shri Paramhans Ji Maharaj indang Samadhi den Karak district kübok Teri yimsüing nung Krishna Dwara Mandir, hopta ana tsüingda yanglushitsütsü tetuyuba agütsüogo.

Iba Hindu nunger indang temple ya December 30 nü nisung noklang aika adenshi rongtoktsü.

Taoba mapang Pakistan indang chief justice, Gulzar Ahmed-i, Supreme Court-i iba ken o January 5 nü angadangsü ta shir liasü.

Minority MP Ramesh Kumar-i, taoba hopta Karachi nung senden amenba mapang temple raksatsüba indang metetdaksüba sülen chief justice-i jenjang agi.

Khyber Pakhtunkhwa sorkar aser Auqaf department dang mapa tangsa tang tenzüksü aser hopta ana tsüingda mapa inyakyonga aoba osang agütsütsü tuyuogo.

Chief justice-isa, temple raksatsürtemi yanglushiba taa menoktsü, ta shiogo.

Okadak ajangasa Pakistan nung temple kwi lir, Auqaf department ali atsüingba osang aser ali atsünga aruba azüoktsü atema ketdangsürtemi jenjang agiba

osang agütsütsü tuyuogo.

Pakistan nung temple ajak Auqaf department kübok lir.

Taoba mapang Supreme Court nung lokti nung nütsüing agi ajema alirtem temeden dak sendakba nung one-man commission kati Karak temple raksatsüba indang osang benok. Taoba mapang police tekolakba Muhammad Shoaib Suddle-i iba report renema liasü.

Commission-i temple raksatsüba bushitsüingdangtsü benok. Ken o nung temulung melemi bilemertem rongnung tongtiba Maulvi Sharif-i, nüburtem ajungmeso asütsü ta amanger, ta osang ajanga metetdaksü. Kasa sangdong ajangsa, temple indang ali record ya linük lemdangba mapang koma liasü aji reprangshitsü nüngdaker, ta ashi.

Iba temple ya 1997 küm mezüingbuba maka raksatsü. 2015 küm Supreme Court teyongtsüi aiba sülen iba tesem nung aliba nüburtemi tekülemdak tanaben yanglushitsü mulunga agizük.

Temple yanglushiaka ali dak sendakba nung mangatettep adoka aruogo. Iba ajanga temple pusemertem aser local clerics tem tsüingda mangatettep adok.

Deobarnü tatalokba sülen police-i nisung 14 pua lir.



Sucre yimti, Bolivia nung tetsür ka tzümetsüing agi ponger aoba nungi jenbutsü mechi lamppost ka nung soita aliba noksa nung angur. Mongulbarnü ghonda tesadang ka shi iba yimti nung tzünglu kanga sashi aruba sülen ajungben tzümetsüing adoka nisung pezü shit aküm samaogo, ta police temi ashi.

AR-i Peren nung medical camp ka ayongzük

Dimapur, Aenjeti/January 05, 2021 (TYO): Hombarnü (04.01.2021) HQ IGAR (N) tawabangba kübok Assam Rifles indang Jalukie Battalion-i Nkialwa village, Peren nung medical camp ka ayongzük.

Iba mapang, Assam Rifles indang medical team-i yimertem medical checkup agi aser parnok temang nung timtem den apet nüngdakba mozütem agüja liasü.

Kasa camp nung, team-i yimertem dang COVID-19 wara dak sendakba nung osang tasentem sangoktsü aser tang ama mapang iba tesashi wara nungi kümzüka aser jenboa alitsü asoshi tekümdangtsü meratem metetdaksü.

Manemertem temang repranga aser mozü agütsüba dak alaka, AR medical team-isa Camp nung adenertem nem Masks aser Sanitizer lema agütsü.

Iba medical camp sentong nungi tebur 27, tetsür 36 aser tanur 25 densema Nkialwa yimer 88 shi ajangzükogo.

Tang ama tensa tamajungdang, nübur asoshi bilemja iba medical camp ayongzükba atema Gaon Burah, Chairman aser yimertemi Assam Rifles - Jalukie Battalion dang pelaba metetdaksüogo.

YIMKONG DANG PELAR



Asür Imnakümzük Ozüküm (Mongsenyimti Compound)

"Kechiaser ni asoshi taküm alibaji Khrista, aser tasütsüji tajangzük lir" Filipi 1:21

Onoki teti meima aser akhüm agüja aliba tebuti asür **Imnakümzük Ozüküm** mapang tatsüka shiranga aliba nungi iba akümüli wadang 24th Dec. 2020 anogo tembanger ozü kidang kimang rangpen amang milen züksep tia nung alidang sensosanger, anükapang, temba-tinu den ana aser talang nungi shirnokisa sarasadem, shisatsü aser ali rongsen agi yaritepa ozü tako marok khuret kokttdaksüogo nenok ajak dang kangasa pelaba lemsateper.

Nenok mapa tajung onoki teti bilemtettsü aser asen teyanglur Tsüngremi nenok taküm lenmang ajak nung talubosa moatsütsü ozü tamang sarasadem.

Temeim kinungtsü, jala-jabaso aser semchirtem.

KANGASA PELAR



ASO : 21.10.1970

ASÜ : 31.12.2020

Onoki meima aliba **TEMSÜLEMBE KICHU** (S/o. Late Nokchachiba, Khensa) asükhu nung kija, kibong, lokti tentet balala shirnokisa nübo, shisatsü, rongsen, aser sarasadem agi yariogo nenok ajak dang kangasa pelaba lemsateper. Tsüngremi nenok ajak moajangma.

Temiem Kinungtsü, Jala, Jabaso & Kinungertem.

Tepela Lemsateper

"Kibubai agütsü aser Kibubai bener ao. Kibuba tenüng moajang." Yob 1:21



TASOBA : 09.02.1966

TASÜBA : 26.12.2020

Onoki teti meima aliba asür **M. Atula Ao** (W/o. M. Nuklutoba Ao) shirang yipten nung aliba mapang nungi tasüba anogo tashi kija aser lokti kwikati tamang sarasadem, rongsen, shisatsü aser nübo agi yariogo, nenok ajak dang pelaba lemsateper. Nenok ajak dang tsüngdong arua melemsatepaka tajungsang Tsüngremi nenok temeim mapa tajung asoshi maneni mola-moshia moajangma.

Temeim Kinungbo, Jalatem aser Kinungertem.

Pelaba Lemsateper



ASO : 09.07.1981

ASÜ : 21.12.2020

Onoki teti meima aliba asür **Intimatsung Jamir**, iba akümüli nungi pila orr onok mangyim jashi tia nung alidang, shirnokisa onok dang temeim sayua mapa tajung agi yariogo, nenok ajak dang kinungertemi pelaba lemsateper.

Ozü asükhu mapang, shirnokisa rongsen, nübo aser sarasadem agi nongita yariogo, nenok ajak dang kangasa pelaba shisemer.

Nenok kija shia tenüng teta onok pelaba lemsateptsü tamakoktsü asünung, imlibilema iba sabang ajanga onoki temulung taroktiba nungi tepela lemsatepba agizükangma.

Temeim Kinungtsü aser Kinungertem.

'Eternals' atema Chloe Zhao-i script zülüogo

Los Angeles, Aenjeti/January 05, 2020 (Agencies): Marvel indang taruba superhero movie 'Eternals' atema director Chloe Zhao-i film script zülutsüogo ta sangdong ka ajanga metetdaksü.

Arishi küm 48 tain Chloe-i Marvel Cinematic Universe indang taruba film 'Eternals' ya direct asütsü aser laisa film indang script zuluba osang jangjatsüogo.

"'Eternals' atema ni script zülutsüogo aser script maparen nüburtem dang ano mesangdong. Film otsü züluba maparen nung ni tongti shilem ka agiogo aser iba maparen atema ni meinyak asübo bilemba

ama meinyaktetla. Kü taküm nung ni iba inyakyim majangshidang aser kenü anogobo iba ya inyaksü asoshi ni yongya aruogo," ta Chloe-i ashi.

Taoba mapang film balala nung inyaka arudang lai ajangshibatam amshia iba script züluba indang director Chloe-i lemsateper.

La indang project tasen 'Nomadland' ajungkettsütsü asoshi YouTube den interview agiba mapang, Chloe-i, "Script züluba maparen nung ni kü tasatem amshiogo aser ibaji shilem tuluka alitsü. Iba den külemi kü indang taoba film

asem nungi angazükba tasatem amshiogo."

Iba project achaayangtsü atema la dak temulung lema maparen nüngloksüba asoshi, Chloe-i Marvel boss Kevin Feige aser producer Nate Moore naprongla dang pelaba metetdaksüogo.

"Kü maparen ajunga nung tenati (Kevin aser Nate) ni kanga pusemogo. Iba den külemi MCU nung jenjang ka yanglutettsüsa kü shisatsü agi atongba tashi ni meranga achaayanga arudar. Iba project maparen tulu lir aser nenok nem iba ya reprangdaksütsü asoshi yongyaseter," ta lai shisem.



Ongpangkong Kaketshir Mungdang (OKM)-i ayongzükba tetsü oshi tetoktepba 2018-2021 sentong küm asem tashi tetoktepba tapu balala agiyonga arur tanü Jan 5 nü tatembangbuba tetendangba Mokokchung town hall nung takok ngua agir külen, takok angur parnok asem den sentong meraketsür Ao Senden Tir, Wb. Chubawati Longchar, OKM ketdangsürtem aser sentong nung shilem agir kar densema noksa nung angur. Iba tetoktepba nung mezüing senpetji Longmisa unit nungi Kr. Wangshimonglai agizük, tanabuba aser tasembubaji Chuchuyimpang unit nungi dang Kr. Manenjungla aser Kr. Lanukokla nati angu. Mokokchung, January 5, 2021.

LONGKUMER ENTERPRISE

Advertisement

JOB OPENING : OFFICE ASSISTANT

Office Assistant at Longkumer Enterprise, Mokokchung ; Nagaland.

Interested candidates can send your :

1. CV/Bio-data, 2. One Passport size photo.

Forward to : lkr_telecom@yahoo.co.in within 20th January 2021

For further information:

Contact - 8837285012 / 8131860987

NÜBURTEM DANG METETDAKTSÜR

Rising People's Party ta nüngja agütsür political party tasen ka tentettsü atema benokdanga lir, ta nüburtem nem metetdaksür. Party office ya H.No. 202, Ground floor, Fellowship Colony, Dimapur-797112, Nagaland nung amenoka lir. Iba party yagi Election Commission of India, New Delhi nem, Representation of People Act, 1951 kübok Section 29A nung ajemdaker Political Party ka ama züngoksemtsü atema application agütsüogo. Party ketdangpurtem tenüng aser address yamai alitsü:

- President :** Mr. JOEL NAGA, R/o H. No. 202, Fellowship Colony, Dimapur-797112, Nagaland.
- General Secretary :** Mr. LUNGLY CHINGKHU, R/o Signal Angami Village, Dimapur-797112, Nagaland.
- Secretary :** Mr. LHIKHRO KREO, R/o H.No. 34, Bade Village, Dimapur-797112, Nagaland
- Treasurer :** Mr. VITHO ZAO, R/o Kacharigaong Village, Dimapur-797112, Nagaland

Rising People's Party züngoksemba dak sendakba nung tashishiba kar danga lira kuli dena Secretary (Political Party) Election Commission of India, Nirvachan Sadan, Ashoka Road, New Delhi-110001 dangi iba osang sangdongba sülen anogo 30 tsüngda yoktsü metetdaksür.

Noklak nung football asayamung tenzükogo



Dimapur, Aenjeti/January 05, 2021 (TYO): Mongolbarnü, public ground, Noklak Hq. nung Nagaland Football Association, vice president, Colo Mero-i 'Invigorating the talent' omen kübok football asayamung tenzüksüogo, ta sangdong ka ajanga metetdaksü.

Iba football asayamung lapokba sentong nung Colo Mero-i, saiaponger tajung ka akümtsü asoshi, tila asüdag nung training shitak agia asaya tenzüksüla, ta telok dang ashi.

Asayamung nung shilem agitsüpurtem ajungshiba mapang, Mero-isa asayartem dang lenla ajunga nung ajemalua inyaksangshitsü asoshi tetuyuba agütsü.

Khiamniungan Sports Council, President, Er.Elo Khiamniungan-ia iba asayamung lapokba sentong nung jembia liasü. Kasa mapang, Games and Sports Secretary, Khiamniungan Students Union, Sheying-i telok pela agizük.

Khiamniungan Sports

Council den Khiamniungan Students Union longjemer iba asayamung ayongzüker.

Maneni, Covid-19 wara dak sendakba nung tekümdangtsü proktsü asoshi Indian Red Cross Society Noklak District Branch-ia stall ka amenok aser asayamung nung shilem agir team ajak nem tejak nembangba mask aser sapon lema agütsü. Iba asayamung nung team 19 agi shilem agidar aser January 14, 2021 nü tembangtsü, ta kasa sangdong nung shia lir.

Australian Open asayartem Quarantine Hotel tasenba nung amungtsü

Melbourne, Aenjeti/January 05, 2021 (Agencies): Melbourne kübok luxury hotel ka nung apartment kiburtemi ashishitepa ozüing agi melaba ama teinyaktsü tim amshitsü asoshi amokmerenba ajanga, Grand Slam asayamung tenzüksü aliba ita ka tejakdang international asayartem atema Australian Open ayongertemi renemer aliba quarantine mapatongtem melenshitsüsa akümer.

February 8 nungi 21, 2021 tashi ayongtsü aliba Australian Open asayamung tejakdang Tennis Australia aser Sorkar tekolapur temi Westin Melbourne nung asayartem atema anogo 14 quarantine tesem renemtsü.

Mongolbarnü, Westin nung apartment kiburtemi parnok dang junga masüingdangya ta ashishitepba aser iba inyakyim anema nokdaksü ta metetdaksüba sülen, iba

sentong (asayartem quarantine) agienadok.

"The Westin Melbourne nung kiburtem, hotel nung alirtem aser COVID-19 Quarantine Victoria den jembiteper sülen taruba ATP atema Melbourne-i arur asayartem aser support staff tem asoshi tanga tesem nung hotel ka achaayangtsü telemetba agiogo," ta Westin-ia shi.

Australian Open nung International asayartem January tom ka nungi Melbourne yimti tonga arutsü imlar.

Mongolbarnü, Victoria state Police Minister, Lisa Neville-i osangbener dang ashiba agi, asayartem atema quarantine hotel tanga ka anepaludar.

Grand Slam metenzükdang, Melbourne Park nung temaba jenjang nung alir tennis asayartemi asayamung nung shilem agitsü tebilemba lir.

Kasa mapang, World no.1 Novak Djokovic aser World no. 2 Rafa Nadal napronglai ATP Cup nung shilem agitsü ama asadanteter, koba February 1 nungi 5, 2021 tashi asayamung metenzükdang, quarantine nung amungtsü atema hopta ana jelia Melbourne tonga arutsü imlar.

Australia nung Victoria state indang yimtiba, Melbourne ya COVID-19 wara sashia poktetba rongnung tesem tanabuba liasü, koba bendanglen tesem balala nungi arurtem atema quarantine hotel ana nungi prokshi tenzük.

Iba wara sashia prokba mapang, Victoria nung nisung 18,000 dak tema iba tashidak putet aser nisung 800 jungnüa taküm sama.

Mongolbarnü, Victoria kübok hotel quarantine nung nisung ka densema Melbourne nung nisung pezü dak iba tashidak tejangja putet.

Man.City tetsür team nung asayar pezü dak Covid-19 putet

London, Aenjeti/January 05, 2020 (Agencies): Manchester City indang tetsür team nung asayar pezü dak Covid-19 tashidak putetogo aser parnok ajak shinga den majurutepdaksüi anepaludar, ta Hombarnü club sangdong ajanga metetdaksü.

City nung tetsür asayar pezü

dak tashidak tasen putetba osang agütsüba dak alaka club-i parnok tenüng memetetdaksü.

Tesüiba hopta ana tejakdang, Manchester City tebur squad nung asayar trok dak Covid-19 tashidak putet. Tekümdangtsü mera agitsü asoshi Everton nung Club indang Premier League asaya

anogo atsülangtsü aser training agiba tesem anogo ana atema shibangtsü.

Women's Super League table nung City pur asaya 9 nung shilem agir sülen point 18 ngua jenjang pezüba tongteta lir. Tan Honibarnü par telok West Ham United pur den asayatsü.

ATP Cup nung Djokovic o Nadal na asayatsü

Sydney, Aenjeti/January 05, 2021 (Agencies): ATP Cup champion Novak Djokovic aser runner-up Rafael Nadal naprongla February 01, 2021 nü nungi tenzüksü aliba tennis season nung shilem agitsü terenemba lir, saka asayamung dak sendakba nung anogo/ mapang melenshiadokba ajanga United States nungi asayartem masayatsü.

Taoba küm Tennis tenzükba season nung team 24 agi shilem agiogo aser asayamung ya Australia kübok yimti asem nung lemsar asaya, kong Sydneys Ken Rosewall Arena nung final asaya aser iba mapang Djokovic'er Serbia team-i Nadal aser Spain team tsükdaksü.

February 1 nungi 5, 2021 tashi ayongtsü aliba edition tanabuba nung team 12 agi shilem agitsü aser COVID-19 tenokdangba liaka, tetuyuba nung Melbourne Park kübok asaya ajak ayongtsü. Iba sülen, WTA aser ATP asayamung aser Australian Open asayatsü.

Iba draw ya January 20 nü team tem telok pezü lemsar asayatsü. Round-robin telok nung takoker shia semi-final-i ayitsü.

ATP Cup atema Qualification ya linük nung temaba asayartem indang ranking nung asadanga liasü, kong wildcard entry nung Australia densem. Kasa tetoktepba nung shilem

agitsüpur tanga linük rongnung Austria, Russia, Greece, Germany, Argentina, Italy, Japan, France aser Canada densema lir.

Season indang mezüing asayamung, koba anogo atsülangja liasü, iba edition metenzükdang Australian Open atema tanga linük nungi Melbourne-i arur asayartem ajak anogo 14 quarantine asütsü nüingdaker. Küm shia Australian Open ya January ita atemtsü hopta ana lia ayongzüker, saka alima ajunga asüingba COVID-19 dak sendakba nung senzusenbongtsü nokdangba aser tanga nung tetsükdaksü balala ajuruba ajanga taruba ita February 08, 2021 nü nungi tenzüksü asoshi anogo atsülangtsü.

Tebur kija atema qualifying asayatem Doha, Qatar aser tetsürtem atema Dubai nung ayongzüksü. Qualifying asayamung anaprongla January 10 nungi tenzükba 13 tashi asayatsü.

Maneni tanga saisapongtem ama, coronavirus tenokdangba ajanga 2020 küm international tennis calendar nunga timtem tulu adoka tongtibang asayamung aika thitsü. May nungi September tashi French Open asayamung anogo atsülangtsüba den Wimbledon asayamung thija liasü, koba World War II sülen iba asayamung thitsüba ya mezüing alitsü.

Test tasembuba nung James Pattinson masayatsü

Sydney, Aenjeti/January 05, 2021 (Agencies): Australian pacer James Pattinson tesaret yiruba ajanga Hombarnü (04.01.2021) aruya aliba India aser Australia Test series tasembuba nung shilem magitetsüsa kümogo, ta Australia Cricket Board sangdong ka ajanga metetdaksü.

Test series tasembuba ya January 7 nungi 11, 2021 tashi Sydney Cricket Ground nung asayatsü renema lir.

"Fast bowler James Pattinson tesaret nung timtem aliba ajanga #AUSvIND Vodafone Test tasembuba atema Australian squad nungi pa agienogo," ta Cricket Australia (CA)-i lemsatet.

Pattinson, shiba par kidang alangdang yirua liasü, pa melen asayatsü asoshi tanga asayar ano meshimtet lir.

"Squad nung pa melen tanga asayar meshimtsü aser Brisbane Test asayatsü aliba tejakdang pa temang jenjang asadangshitsü," ta CA-i shisem.

Asaya pezü Test series nungi tasembuba asaya nung Pattinson masayatsü asünung, asayar 11 nung Michael Neser aser Sean Abbott na rongnung ka anioka asayatsü. Melbourne nung Test tanabuba asayadang all-rounder Michael-i substitute ka ama shilem agia liasü.

Iba Test series mezüing asaya nung Pattinson-i tesüsa Australia den asayaago, kong par teloki iba asaya takok angu aser pai wicket asem tashi out sütsü.

Australia atema Pattinson-i 21 ben tashi asayadang, pai bowling average 26.33 nung wicket 81 agiogo aser taoba küm January ita New Zealand den Test asayadang team den külemi shilem agiogo.

Mezüing Test asaya anaprongla nung arishi küm 30 tain Pattinson-i külem team pur den masayatet aser Test asaya tasembuba nunga külem asayar Mitchell Starc, Josh Hazlewood, Pat Cummins aser Nathan Lyon nunger den masayatetsüsa akümer.

BILEMDANGANG

"Tagütsür asoshi sübokremji tepuatsü lung."